



TUVAO

Tala Fou a le Lala o le Tulafono ma le Amiotonu a Samoa

LOMIGA 1 NUMERA 3



Oketopa 2013

Tala Fou

- 1 Tatala le Fale Fou mo Suesuega o Fualaau Faasaina
- 3 Tauto le Tamaitai Faamasino Fou
- 4 Tavaluga le Aoaoga Soalauapule
- 6 Faamanatu le Aso Faapitoa mo Tagata Faigaluega a le Malo
- 7 Aso Faalauiloa a le Lala o le Tulafono ma le Amiotonu a Samoa 2013
- 9 Faatalanoaga mo se Resitara o e ua faamaonia Soligatulafono Faigaiga
- 11 Kalena ma Tuatusi o Vaega Taitasi o le Lala

Tofamamao:

Faatinoina o le Amiotonu mo le Saogalemu ma le Mautu o Samoa.

Tofaliliu:

Tautua e Unaia, Puiipui ma Faaleleia Avanoa i Faamasinoga aua le faatinoina o le Amiotonu mo le Saogalemu ma le Mautu o Samoa.



Faamalosia Taumafaiga e Tete ai i Fualaau Faasaina



O le aso 31 o Iulai 2013, na faia ai se sauniga faapitoa e tatala aloaia ai le fale fou mo le suesuega o fualaau faasaina. O lenei atinae e \$40,000.00 lona tau; o se taumafaiga sa galulue soosootauau ai le SROS, Ofisa o le Loia Sili ma le Matagaluega o Leoleo ma Falepuiipui. O le faamoemoe ina ia mafai ona faatino suesuega i totonu o Samoa faapei ona faatino i isi atunuu uma o le lalolagi. O le taimi nei, e na o mariuana o lo o mafai ona suesueina i le Fale Suesue lenei, ma e toalua ni Saienisi a le SROS o lo o galulue ai.

O le lauga autu o le aso na saunoa ai le Afioga i le Palemia, Tuilaepa Sailele Malielegaoi. Na saunoa le Palemia, o se faataitaiga lenei o galuega e mafai ona faatino e Samoa pe a galulue faatasi vaega eseese o le Malo.

"O se galuega lenei sa pulupululima ai Vaega uma o le Lala o le Tulafono ma le Amiotonu e foia ai le faafitauli sa fai ma vaatua i le taumafaiga e tete ai i Fualaau faasaina", o lana saunoaga lea. Na ia taua foi, o lenei atinae o se fuafuaga sa aofia ai le Ofisa o Leoleo, Matagaluega o Galuega, Soifua Maloloina, SROS ae taitai e le Ofisa o le Loia Sili. "E iai vaega e faalagolago iai le faamalosia ma le lelei faatautaia o mataupu e aofia ai fualaau faasaina, ma o se tasi o vaega pito taua, o le iai lea o se fale suesue. E faafetaia ai le sao o le SROS i Nafanua. E iai luitau e ono tulai mai i le faatautaia ai o le fale suesue, ae faafetai mo le taliaina o na luitau", o le Palemia lea.

Na faaalua e le Pule Sili o le SROS, Tilafono David Hunter; o le taua o le iai o se fale suesue i totonu o le atunuu, e le gata ina faamoemoeina ae e taugofie foi. Na ia saunoa, talu ai ona o le SROS o se vaega tutoatasi, e tutoatasi foi le fale suesue ma suesuega e faatino ai. "E leai la se faaituau," o lana saunoaga lea. "O le faamoemoe autu lava ina ia mafai ona faatino lava i Samoa suesuega faapenei, ae le toe lafoina i atunuu i fafo e faatino ai."



*'O le fuafuaga mamao
o lo o iai, o le
faatotogaina lea o le
fale i meafaigaluega e
moomia mo suesuega o
isi fualaau e malolosi atu
i lo le mariuana e pei o
le aisa'*

(faaauau mai le itulau 1)

Na ia saunoa foi o le faatulagaga o mataupu i le Faamasinoga e fuafua i le avanoa o se Saienisi suesue mai atunuu i fafo. "O le iai la o le fale suesue lea, o le a alu ai loa i aso e faatulaga mai e le Faamasinoga le fofogaina o mataupu. O le isi itu taua, e taugofie atu le faia o suesuega iinei, aua e taugata tele mo le Matagaluega o Leoleo le lafoina lea o fualaau i fafo mo suesuega."



"Sa masani ona moomia le auina mai o se tagata suesue mai se faalapotopotoga suesue i Niu Sila, ae faatupe e le Matagaluega o Leoleo, a o le taimi nei, o le a na o le tau lava o le suesuega e totogi e le Matagaluega o Leoleo."

O le tulaga lena sa iai seia oo mai i le lima tausaga talu ai, ina ua amata faatino suesuega i le fale suesue a le lunivesite o le Pasefika i Saute (USP) i Alafua.



Na faaalua e le Alii Loia Sili, o le a iai nei se alafua fou mo le faatinoga o mataupu nei i le Faamasinoga. "O le a le toe iai le feagaiga lea i le va o le USP ma le Matagaluega o Leoleo, aua o lea ua maea fausia le nofoaga fou mo Suesuega o Fualaau Faasaina i Nafanua," o lana saunoaga lea.

"Faafetai i le sao o le USP i le Lala o le Tulafono ma le Amiotonu a Samoa i le lima tausaga ua mavae, o lo latou fesoasoani mai, lea ua mafai ai e Samoa ona faatu sana ia lava fale suesue. Ou te faafetai foi i le Malo o Ausetalia mo le faatupega o lenei atinae tauala mai i le fesoasoani a le AusAID i le Lala o le Tulafono ma le Amiotonu a Samoa," o le Loia Sili lea.

Na toe faaalua e Tilafono, o le faalapotopotoga lenei mo Suesuega Faasaienisi a Samoa (SROS) ua aloaia faa va o malo talu mai le tausaga e 2011, ma o suesuega uma foi e faatautaia ai, e aloaia faa va o malo foi.

O le tausaga talu ai na faaoo atu ai le talosaga a le SROS i le Ofisa o le Loia Sili mo le faatupega o lenei faamoemoe. "E lima vaiaso na taumafai ai le fausiaina o lenei fale," o lana saunoaga lea. "Sa taumafai e fausia i se tulaga e saogalemu ma malu puipua, i le maea ai la o lona fausiaina, e na o Saienisi Suesue faapitoa lava e faataga ona ulufale i totonu." Na faaalua foi e Tilafono, o lenei atinae o se vaega o se fuafuaga alualu mamao a le Faalapotopotoga. "O le fuafuaga mamao o lo o iai, o le faatotogaina lea o le fale i meafaigaluega e moomia mo suesuega o isi fualaau e malolosi atu i lo le mariuana e pei o le aisa. E le gata i lena, ae e moomia foi le faoaina atili o tomai ma agavaa o i latou e galulue i le fale suesue lenei. O le tele lava o ituaiga ma le malolosi o fualaau faasaina e suesue, o le tele foi lea o le moomiiga mo agavaa o i latou e galulue i le fale suesue."

Ata (luga): Afioga i le Alii Palemia i le saunoaga autu o le aso,
(ogatotonu): Afioga i le Loia Sili a o faafeiloai atu i le auvalaaulia;
(lalo): Auvalaaulia a o affio atu e silasila i totonu o le Fale Suesue fou.



Faatauto le Tamaitai Faamasino Fou

O le aso Faraile 23 o Aukuso 2013 na faatauto ai le Tamaitai Famasino fou ia Tafaoimalo Leilani Tuala-Warren e avea ma Faamasino o le Faamasinoga Faaitumalo a Samoa, ma ua toatolu iai Tamaitai ua tofia e avea ma Faamasino i le Faamasinoga a Samoa.

O se sauniga na auai ai le tele o ona aiga ma ana uo a o faatautoina e le Afioga i le Faamasino Sili, Patu Falefatu Sapolu; lea na saunoa i le tamaitai Faamasino ina ia galue "e aunoa ma le fefe po o le alofa".

Na saunoa foi Patu, o le soifuuga masani, o le alofa lea i aiga, fesoasoani i uo, ma le faia lea o faaiuga e le itagia ai oe e isi tagata, peitai o le Faamasino, e te tautu i lau tautoga. "E te faamoemoe i le Atua e foi atu le malosi ma taitai oe. Aua o mea uma sa e masani ai, e suia ma aveesea uma pe a avea oe ma Faamasino ae e tutoatasi." Na saunoa faamanuia foi le Afioga i le Loia Sili i le tofiga fou ua tulai ai Leilani, na ia faamalo foi i lona sao i auunaga faa le tulafono a Samoa aemaise i le tulaga sa iai a o lei tofia e avea ma Faamasino, le Faaluuluga o le Komisi mo le Toefuataiga o Tulafono a Samoa.

Ina ua talii mai Leilani i Samoa i le tausaga 2008, sa ia talia ai le galue i se tofiga e utiuti mea faigaluega. "Sa ia talia le luitau o le leai o sana afaigaluega, leai se taavale ma leai se Ofisa", o le saunoaga lea a le Afioga i le Loia Sili. "Sa ia taulimaina le Komisi o le Toefuataiga o Tulafono mai lona tau amataga, o lona onosai ma le galue faamaoni, ua tulai mai ai le Komisi i le maea ai o le lua tausaga i se tulaga ua mafai ona tutoatasi, ua iai le afaigaluega ma ua atoatoa mea faigaluega. Sa ia tapena ripoti manino ma le taua mo le Palemene, o lona sao lea i le atunuu e avea ma faatupu manatu i mataupu eseese e aofia ai ma talitonuga faa le aganuu ma faa le lotu." Na ia saunoa faamalo foi i le tamaitai Faamasino i lona faatautaia o faatalanoaga faalauaitete. O nei faatalanoaga sa faatino ina ia maua manatu faaalii o le mamalu lautele o le atunuu, ma sa faamoemoe iai le fausia ma le iloiloga o le tele o tulafonoe aofia ai le Tulafono mo Soligatulafono 2013, Tulafono mo Loia ma le Teuteuga o le Tulafono o Fono a Nuu."

Na auai foi Faamasino o le Faamasinoga Mauuluga, Faamasinoga Faaitumalo, Peresitene o le Faamasinoga o Fanua ma Suafa e molimauina lenei faamoemoe taua.

O le susuga i le Faifeau Toeaina ia Peteru Tone na taitaia le sauniga lotu a o le afaigaluega a le Matagaluega o Faamasinoga sa lagjiina viiga o le Atua. "O auo Tafaoimalo Leilani Tuala-Warren, ou te tatuto i le Atua e ona le mana uma lava, o le a ou tautua ma le famaoni e tusa o le Faavae o le Malo Tutoatasi o Samoa, o le a ou faamasino ma le tonu, e aunoa ma le fefe po o le alofa, ia fesoasoani mai le Atua ia te au", o lana tautoga lea.

Sa aooaina Tafaoimalo i le Lunivesite o Waikato i Niu Sila, ma sa faauu ai ona tikeri o le Bachelor of Laws ma le Masters in Law.

O le maea ai o ona aooaga na toe foi mai ai i Samoa ma galue i le Ofisa o le Loia Sili a o lei toe foi atu ma toe galue ai o se faiaoga i le Lunivesite o Waikato lava. I le maea ai o ni nai tausaga na toe talii mai ai i Samoa ma galue i le Ofisa Loia a ona tuagane, le Tuala Law Firm.

Ata: Tamaitai Faamasino fou i lona faatautoga i luma o le Faamasino Sili, Tafaoimalo ma le Loia Sili faapea le Sui Peresetene o le Sosaiete o Loia a Samoa ina ua maea le sauniga o le faatautoga.





“O le soifuaga masani, o le alofa lea i aiga, fesoasoani i uo, ma le faia lea o faaiuga e le itagia ai oe e isi tagata ; peitai o le Faamasino, e te tautu i lau tautoga. E te faamoemoe i le Atua e foai atu le malosi ma taitai oe. Aua o mea uma sa e masani ai, e suia ma aveesea uma pe a avea oe ma Faamasino, ae e tutoatasi.”

Ata: Vasega Faauu ina ua maea le sauniga o le tufatufaga o Tusipasi.



(faaauu mai i le itulau e 3)

O le tausaga e 2008, na tofia ai Tafaoimalo e avea ma Faauluuluga o le Komisi mo le Toefuataiga o Tulafono a Samoa.

Sa auai foi i lenei sauniga le Sui Peresetene o le Sosaiete a Loia Samoa, Mareva Betham-Annandale, ma o ia na fai ma sui o le Sosaiete e momoli la latou faamalo ma faamanuiaga i le tulai mai o Tafaoimalo i le tulagaFaamasino o le Faamasinoga Faaitumalo o Samoa, o se Faamasinoga taua tele aua le tagofia o mataupu tau i aiga.

Na saunoa le Tamaitai Faamasino fou e faafetaia i latou uma sa lagolagoina ana taumafaiga. Sa ia faafetai faapitoa i le taitaiga a le Afioga i le Faamasino Sili, le Faamasino Sinia ia Vaemoa Vaai, afioga i Faamasino ia Lesatele Rapi Vaai, Justice Nelson ma Justice Slicer ae le gata i lea o le fesoasoani a isi Famasino Tamaitai e toalua, Justice Malosi ma Judge Tuatagaloa.

Na faaleo foi lana faafetai i aiga uma ma uo sa auai atu e molimaaina lea aso.

Sa ia faafetai foi i ona tuagane ma o la aiga, o lona tuua aemaise lona toalua ma ona alo, i le lagolagosua ia te ia.

Faaiuina le Aoaoga Soalaupule

O le aso 4 o Setema 2013, o se aso fiafia lea ia i latou e toa 21 sa aoaoina i le 'Aoaoga Soalaupule', ina ua tuuaoina o latou tusipasi sa tufatufaina i se sauniga faapitoa sa faia i le potu fono a le Matagaluega o Faamasinoga ma le Faafoeina o Tulaga tau Faamasinoga.

O le Peresetene o Famasinoga o Fanua ma Suafa, Afioga Tagaloa D.C.Kerslake faatasi ai ma Polofesa Aiono Dr. Fanaafi ma Polofesa Selene Mize mai i le Lunivesite o Otago, o matuaofaiva ia o le aoaoga, sa o latou tauaoina atu tusipasi o le au faauu.

Na saunoa le tamaitai Polofesa ia Selene, ua 25 tausaga talu ona ia faatinoina aoaoga mo le soalaupulega o feeseeseaiga, ma e faamuia ia Samoa ona o le Soalaupule o se vaega o lana aganuu. E faigata tele ona malamalama le tele o tagata sa ia aoaoina i le mataupu lenei o le fefaasoai, peitai e le fou i tagata Samoa. Na tauluga le saunoaga a Selene i lona foai faamealofa atu i le Afioga i le Faamasino Sili se tusi mo le faletusi a le Faamasinoga Maualuga o Samoa.

Na faaalua foi le ata video o le saunoaga sa tuuina mai a le Alii Polofesa o le Lunivesite o Otago, Mark Henaghan, na ia saunoa faamanuia mai ai i le vasega faauu.

'O outou o ni tagata maoae le lelei ma le tausaaia, ma ou te iloa foi sa outou galulue ma le faamaoni i lenei aoga. Tou te alala i le vaega pito o matagofie o le lalolagi', o lana saunoaga lea.

Na ia saunoa foi i le taua o le soalaupule pe a fofa feeseeseaiga: e lagona ai e itu auai uma le faataucaina o o latou finagalo, ma faigofie ai foi ona latou talia se faaiuga e taunuu iai, aua sa aafia i le faatalanoaga lea e fesoasoani i le maua o le faaiuga.



(faaauau mai le itulau 4)

'O le Soalaupule e mafai ai e tagata ona faalelei a latou feeseeseaiga ma taunuu ai i ni faaiuga latou te malililie iai ma taliaina,' o lana saunoaga lea.

O le Afioga i le Minista Lagolago o le Matagaluega o Faamasinoga, Taefu Lemi, na saunoa e fai ma sui o le au faauu.

E 21 le aofai o i latou na faamanuiaina i tusipasi, o le 17 o lenei vasega o ni isi o le afaigaluega a le Matagaluega o Faamasinoga e aofia ai ma lo latou Pule Sili. O le isi vaega o le vasega faauu e aofia ai le Pule Sili o le Komisi e Pulega Galuega a le Malo (PSC) Minista Lagolago o le Matagaluega o Faamasinoga, Failautusi o le Ofisa Tutotonu o le Lala o le Tulafono ma le Amiotonu, o se Alii Suesue Satini Sinia mai i le Matagaluega o Leoleo faapea ma se sui mai i le Ofisa o le Komesina o Sulufaiga.

O lenei aoga o se taumafaiga sa soosootauau ai le Matagaluega o Faamasinoga, o le Lunivesite o Otago ma le Lala o le Tulafono ma le Amiotonu a Samoa, ma sa faatautaia mai i le aso 11 o Iulai seia oo i le aso 3 o Setema, 2013.

O le sini autu lava o lenei faamoemoe ina ia maua le agavaa i le Soalaupule aua le faatalanoaina o mataupu tau i le Faamasinoga o Fanua ma Suafa. O le Tulafono o Fanua ma Suafa 1981 o lo o aiaia ai le faamalosi lea o le faatinoga o le Soalaupule i mataupu uma tau Fanua ma Suafa, a o lei tuuina atu mo se faaiuga a le Faamasinoga.

O matuaofaiva po o faiaoga sa feagai ma lenei galuega e aofia aile tamaitai Polofesa o le Lunivesite o Otago ia Selene Mize, le Peresetene o le Faamasinoga o Fanua ma Suafa, Tagaloa D.C Kerslake, le Peresetene o le Lunivesite o le Aмоса o Savavau, Polofesa Aiono Dr Fanaafi, le susuga i le Sui Taitaifono o le Ekalesia E.F.K.S Rev. Elder Tautiaga Senara ma le susuga i le faafeagaiga o le E.F.K.S i Fasitoo-Uta, Rev Uta Muulu.

O le vasega faauu e aofia ai i latou nei; Taefu Lemi (Minista Lagolago-MJCA), Masinalupe Tuuu Tusipa Venu (Pule Sili-MJCA), Lavasii Siufaga Tauauvea (Pule Sili Lagolago -MJCA), Papalii John Taimalelagi (Pule Sili Lagolago -MJCA), Faagutu Samuelu-Vaalotu (Pule Sili Lagolago -MJCA), Alofipo L. FaletoluLofipo (Pule Sili Lagolago -MJCA), Lio Heinrich W. Siemen (Pule Sili Lagolago -MJCA), Tuiloma Lopez Williams (Sui Resitara -MJCA), Tavilili Sekuini Auelua (Sui Resitara -MJCA), Togatalima Laiafi Papalii (Sui Resitara -MJCA), SauAlaimoana Faalaituie Isara (Sui Resitara -MJCA), Manuele Fuiono Paulo (Sui Resitara -MJCA), Galuvao Koki Tiatia (Ofisa Sili -MJCA), Motunuu Teofilo Mikaele (Ofisa Sili -MJCA), Florita Esther Schuster (Ofisa Sili -MJCA), Soara Siamomua (Ofisa Sili-MJCA), Aise Malaga (Ofisa Sinia -MJCA), Maualaivao Seiuli P. Seiuli (Komesina Lagogo o Sulufaiga), Maotaolii Kaioneta Aliisolia Kitona (Alii Suesue Satini Sinia-MoPP), Tootoleaava Dr Fanaafi Aiono Le Tagaloa (Failautusi-Lala o le Tulafono ma le Amiotonu), Naea Beth Onesemo-Tuilaepe (Pule Sili - PSC).

"O le tava o le Soalaupule, e lagona ai e itu auai uma le faatauvaina o o latou finagalo, e faigofie ai foi ona o latou talia se faaiuga e taunuu iai le mataupu, aua sa aafia i le faatalanoaga lea e fesoasoani i le maua o le Faaiuga."



Ata: Foliga fiafia o le au faauu ma o latou tusipasi faatasi ai ma se tasi o faiaoga o le Aoga Soalaupule, le susuga i le faafeagaiga, Uta Muulu (E.F.K.S Fasitoo-uta)



Aso Faapitoa mo Tagata Faigaluega a le Malo Samoa – Faailoga Tauvaloa mo le Loia Sili.

'O se tasi o faailoga tauvaloa mo tagata taitoatasi na faamanuiaina ai le Afioga i le Loia Sili. O lenei faailoga e faafetaia ai lona sao taua i le fatuina o le Lala o le Tulafono ma le Amiotonu a Samoa faapea le Komisi mo le Toefuataiga o Tulafono a Samoa'

O se vaaiga matagofie na iai le Aso 27 o Setema i Matagaluega ma Faalapotopotoga Tumaoti a le Malo a o agai mai la latou solo i le Ofisa o Leoleo agai atu i Matagalalua, mo le faatauina o auunaga a tagata faigaluega uma o le Malo o Samoa.



O lenei solo sa taimua ai le failipu a Malu o le Malo ae mulimuli mai i tua Matagaluega ma Faalapotopotoga a le Malo ia latou togiga eseese.

O le taunuu ai o lenei solo na faia ai se sauniga faapitoa i luma o le Maota o le FMFMII, lea na aofia ai ma le tufatufaina o faailoga tauvaloa mo e ua faamanuiaina i lenei tausaga, e le gata i faailoga taitoatasi a o faailoga toatele (group awards).

O le Afioga i le Sui Palemia, Fonotoe Pierre Lauofo na saunoa i le saunoaga autu o le aso, e momoli le faafetai a le Malo e le gata ia i latou sa lautogia mo faailoga tauvaloa ae mo tagata faigaluega uma a le Malo i lo latou sao i galuega faifaiepa a le Malo o Samoa.

O se tasi o faailoga tauvaloa mo tagata taitoatasi na faamanuiaina ai le Afioga i le Loia Sili, Aumua Ming Leung Wai, o ia foi o le Taitaifono o le Komiti Faafae o le Lala o le Tulafono ma le Amiotonu a Samoa. O lenei faailoga e famanatu ai lona sao taua i le faatuina o le Lala o le Tulafono ma le Amiotonu faapea le Komisi mo le Toefuataiga o Tulafono a Samoa.

O le maea ai o lea sauniga na sosoo ai ma se polokalame faalauiloa sa faia lea i le Maota o Tui Atua Tupua Tamasese Efi, e faailoa ai i le mamalu lautele o le atunuu auunaga eseese o lo o ofoina atu e Matagaluega ma Faalapotopotoga a le Malo.

Sa auai uma i lea aso Vaega eseese o le Lala o le Tulafono ma le Amiotonu e faalauiloa auunaga o lo o latou faatinoina.

Ata (luga): Afioga i le Loia Sili i le taliaina o lona faailoga, (lalo): ni isi o le afaigaluega a le Ofisa o le Loia Sili ma le Afioga i le Loia Sili ina ua maea le sauniga i luma o le maota o le Malo i Matagalalua.





Aso Faalauiloa a le Lala o le Tulafono ma le Amiotonu a Samoa 2013.

'O le tele o Sulu e maua ai Figota.' O le muagagana lea sa fai ma vaaiga taulai o le Aso Faalauiloa a le Lala o le Tulafono ma le Amiotonu, 2013 .

O lenei faamoemoe sa faataunuaina i le potu fonu o le maota o Tui Atua Tupua Tamasese Efi i le aso 9 o Oketopa 2013, ma o le taimi muamua lea ua faatino ai lenei ituaiga faalauiloa.

O lenei faamoemoe o se tofa na ae i le Komiti Faafoe faapea le Ofisa Tutotonu o le Lala o le Tulafono ma le Amiotonu, e faalauiloa atili ai auauunaga o lo o ofoina atu e ona Vaega eseese i le mamalu o le atunuu. E le gata i lea ae o se avala foi e sailla ai po o fea o iai finagalo o le atunuu i ni itu e ono faaleleia ai nei auauunaga.

Na amata le polokalame i se Sauniga Lotu na taitaia e le susuga i le Failautusi o le Fono Aoao a Ekalesia Sofoaatasi, le faafeagaiga ia Maauga Motu, o ia foi o se sui o le Komiti Faafoe o le Lala.

Na faamanatu e Maauga i le aofia i lea aso le uiga o le muagagana 'O le Tele o Sulu e maua ai Figota.' O viiga o le Atua na lagiina lea e le afaipese mataina a le 'Ola Toefuataina.'

O le saunoaga autu o le aso na saunoa iai le Taitaifono o le Komiti Faafoe o le Lala, le Afioga i le Loia Sili, Aumua Ming Leung Wai. Sa ia saunoa faafetai ia i latou na auai i lea aso, ae le gata i lea sa ia saunoa foi ma faapupula le taua o lea aso.

Sa auai uma Vaega o le Lala i vaipanoa eseese o le maota sa faamautu iai a latou faalauiloa a o agai atu le mamalu o le atunuu e molimauina. E lei faapito Manu ia Tasi i lea aso, aua e le na o le Lala o le Tulafono ma le Amiotonu sa faalauiloa a latou auauunaga, sa maua foi le avanoa e faalailoa ai auauunaga a isi Lala a le Malo e pei o le Soifua Maloloina ma le Lala o Aoaoga.

O se faamoemoe sa vaaia le taupati atu iai o le mamalu o le atunuu, mai lava i fanau aoga seia oo i nai tina ma tama matutua lea sa avea lo latou auai ma itu na maualuga ai le faamoemoe, ma o se aso e le mafai ona galo.



Ata (luga): Afaipese a le Ola Toefuataina, (lalo): mamalu o le atunuu i le sauniga lotu e tatala ai le Aso Faalauiloa a le Lala o Tulafono ma le Amiotonu.



(faaauau mai i le itulau 7)

Na faatautaia le Polokalame mai i le 9.00 i le taeao agai i le 2.00 i le aoauli, ma sa foliga o se taimi puupuu ona e lei lagona se vaivai i le malu o le ea o le Maota faapea le musika sa taitodluaina ai e na auai i lea aso a o asiasi atu i pausisi a vaega eseese o lo o iai a latou faalauiloa e molimauina auanuga ma fesiligia i itu e fia malamalama ai; po o le faatumuina foi o le pepa fesili sa tuuina atu e le Ofisa Tutotonu o le Lala e avea ma auala e maua ai ni finagalo faaalua o le mamalu o le atunuu i auanuga a Vaega eseese o le Lala.

Na tauluga le aso i le valaaulia lea e le Fofoga o le Aso o le mamalu sa iai e saasaa; ma o se vaaiga sa matua matagofie le faafiafiaina lea o nai tama ma tina matutua ma le loaloa sa iai i lea aso.

O le Sui Tamaitai o Nuu, June Ailvai sa saunoa e tapunia le faamoemoe e fai ma sui o le Komiti Faafaoe o le Lala e faafetaia le affio atu o sui o isi Lala a le Malo, o aoga eseese ma le mamalu lasilasi o le atunuu.

Na faaiuina ma le manuia le aso i se taumafataga sa saunia e le Lala mo e sa feagai ma faalauiloa ma i latou uma sa iai lo latou sao i lenei faamoemoe. O lea aso ua taunuu ai le muagagana a le atunuu 'O le Tele o Sulu e Maua ai Figota'

'O lea aso ua taunuu ai le Muagagana a le atunuu; O le Tele o Sulu e Maua ai Figota'

Ata (itu taumatau): tulimanu faalauiloa a le Ofisa o le Loia Sili, Matagaluega o Tina ma Tamaitai Atinae o Nuu ma Aga Fesootai, Toomaga mo e Puapuagatia faatasi ai ma fanau aoga o lo o faatumu pepa fesili a le Lala, (pito i lalo): mamalu o le atunuu ina ua maea le sauniga lotu, o sui mai Vaega eseese o le Lala i le latou togiga lanu moli, sa fesoasoani i le faamoemoe faatasi ai ma le Tamaitai Failautusi o le Ofisa Tutotonu o le Lala faapea le Afioga i le Pule Sili o le Matagaluega o Faamasinoga o ia lea sa fai ma Fofoga o le Aso.





Sailia Finagalo o le Mamalu o le Atunuu e uiga i le 'Resitara mo e ua faamaonia Soligatulafono Tau Feusuaiga'.

'O le fausia o lenei resitara na afua i se finagalo faaalii o le Faamasino ia Nelsone tali atu ai i le faatupulaia o Soligatulafono Tau Feusuaiga'

O Tesema i le tausaga e 2012 na amata laga ai manatu i le faia lea o se resitara mo e ua faamaonia soligatulafono tau Feusuaiga. Na afua lenei manatu i se mataupu na molia ai se alii e 45 tausaga le matua i le faoolima mataga lea i se teineitiiti e 7 tausaga le matua; ma sa faamaonia ma faasalaina i le 3 tausaga.

I faamaumauga na maua ai, o le tausaga e 2009 na molia ma faamaonia muamua ai foi lenei alii i le moliaga lava lea e tasi. Na saunoa le Afioga i le Faamasino sa taulimaina lenei mataupu, e faapea:

"Pe lei alagatau ona fausia se Resitara e tuu iai igoa o i latou uma ua faamaonia soligatulafono tau feusuaiga, atonu o le a silafia ai e le atunuu ituaiga tagata o lo o siomia ai a latou fanau." Ua manino mai, e le i maua e lenei alii se aoaoga tava mai i lona moliaga muamua i le soligatulafono lava lenei, ma e ono toe molia mai foi".

'Pe lei alagatau ona fausia se Resitara e tuu iai igoa o i latou uma ua faamaonia soligatulafono tau feusuaiga, atonu o le a silafia ai e le atunuu ituaiga tagata o lo o siomia ai a latou fanau'



Ata (luga): fetufaaiga o manatu i faatalanoga sa faia i Savaii, (lalo): faatalanoaga ma Faalapopotoga esese sa faia i Upolu.



*'O finagalo faaalua nei
o le atunuu o le a
faaoga e le Komisi e
fau ma tuufaatasi ai se
ripoti ma se tuualalo e
tuuina atu i le
Kapeneta mo sana
Faiuga'*

(faaauau mai le itulau 9)

O le finagalo faaalua lea o le Afioga i le Alii Faamasinona faatei ai manatu o le toatele pe e lei talafeagai lenei fuafuga mo Samoa.

Sa tuuina atu ai loa e le Loia Sili i le Komisi mo le Toefuataiga o Tulafono le fuafuga e latou te sailia pe alagatatau lenei faiga, ae pe faamata o se auala lea e faaitiitia ai solitulafono tau feusuaiga.

O le taimi nei, ua maea faatino ni isi vaega o lenei faamomoe e aofia ai le suesuega ma faatalanoaga faalauaitete

O le sailia la o finagalo o le mamalu o le atunuu, sa faatautaia ai e le Komisi mo le Toefuataiga o Tulafono a Samoa faatalanoaga mai i le masina o Iulai seia oo i le masina o Oketopa. E le gata i le motu o Upolu ae faapea foi le motu tele i Savaii.

E le gata i lenei, ae sa faia foi faasalalauga ma faatalanoaga i nusipepa faapea le televise mo le faamoemoe lava ina ia aao mai manatu o le atunuu e uiga i lenei mataupu.

O finagalo faaalua nei o le a faaoga e le Komisi e fau ma tuufaatasi ai se ripoti ma se tuualalo e tuuina atu i le Kapeneta mo sana Faiuga.



Ata: mamalu o le atunuu a o fefaasoai e ala i le faaaliga o manatu ma le faia o fesili ma tali i le taimi o le Faatalanoaga i Upolu i le maota o Tina ma Tamaitai i Sogi.



Resitala ina ia mau sau lomiga o le TUVAO!

Tusi i le tuatusi fanaafi@samoaljs.ws, valaau mai i le Ofisa i le numera 27426 pe asiasi mai foi i le Fogafale 2, Maota o le SNPF i Apia. E moomia e le Lala lou finagalo faaalua ma le tuuina mai o tala fou mo le TUVAO.

Kalena

Fonotaga a le Komiti Faafaoe 28 Novema 2013

Fonotaga a le Komiti Faafaoe 12 Tesema 2013

Faagata tuuina mai tala mo le isi Lomiga 19 Tesema 2013

Aso Faapitoa Kerisimasi (Aso Malolo) 25 Tesema 2013

E ono iai suiga i le Kalena a le Lala o Tulafono ma le Amiotonu. E mafai foi ona mau lenei kalena i luga o le Upega Tafailagi a le Lala, <www.samoaljs.ws>.

Faafesootai VaegaEseese o le Lala o Tulafono ma le Amiotonu

Ofisa Tutotonu o le Lala o Tulafono ma le Amiotonu a Samoa

Fogafale 2, SNPF, Apia
Telefoni (685) 27426
Facsimile (685) 27428
PO Box 27, Apia, SAMOA
Upega tafailagi www.samoaljs.ws
fanaafi@samoaljs.ws

Ofisa o le Loia Sili

Fogafale 6, maota o leTui Atua Tupua Tamasese Efi
Telefoni(685) 20295 or 20296
Facsimile (685) 22118
PO Box 27, Apia, SAMOA
Upega tafailagi www.ag.gov.ws
attorney.general@ag.gov.ws

Komisi o le Toefuataiga o Tulafono a Samoa

Fogafale muamua, Maota ole Fiamē Mataafa
Faumuina Mulinuu II, Matagalalua
Telefoni (685) 28493 or 28494
Facsimile (685) 28495
PO Box 974, Apia, SAMOA
Upega tafailagi www.samoalawreform.gov.ws
commission@samoalawreform.gov.ws

O le Faamalu o Faalapotopotoga Tumaoti (SUNGO)

Atone St, Vaitete Tai, Apia
Telefoni (685) 24322
Facsimile (685) 20654
Mobile (685) 7522804
PO Box 1868, Apia, SAMOA
Upega tafailagi www.sungo.ws
vaasilimj@gmail.com

Fono a Ekalesia Soofaatasi i Samoa

Mulinuu, Apia
Telefoni (685) 24343
maauga@lesamoa.net

Komesina o Sulufaiga

Fogafale 5, Maota o le Faletupe Tutotonu
Telefoni (685) 25394
Facsimile (685) 21862
PO Box 3036, Apia, SAMOA
Upega tafailagi www.ombudsman.gov.ws
info@ombudsman.gov.ws

Matagaluega o Faamasinoga ma le Faafaoeina o Tulaga Tau Faamasinoga

Mulinuu Beach Road, Upolu
Telefoni (685) 22671
Facsimile (685) 21050 or 20145
PO Box 49, Apia, SAMOA / PO Box 33, Apia, SAMOA
Upega tafailagi www.mjca.gov.ws
info@mjca.gov.ws

Matagaluega o Leoleo ma Falepuipui i Samoa

Samoa Police Headquarters
Telephone (685) 22222 (Emergency line 995)
Facsimile (685) 20848
PO Box 53, Apia, SAMOA
Upega tafailagi www.police.gov.ws
commissioner@police.gov.ws

Matagaluega o Tina ma Tamaitai Atinae o Nuu ma Aga Fesootai

Tooa Salamasina Community Center, Sogi
Telefoni (685) 27752 or 27753
Facsimile (685) 23639
Upega tafailagi www.mwcsd.gov.ws
(Tamaitai) lapelu@mwcsd.gov.ws
(Lotoifale) ffaasalaina@mwcsd.gov.ws
(Talavou) spita@mwcsd.gov.ws
(Pule Sili) ceo@mwcsd.gov.ws

Sosaiete a Loia o Samoa

Telefoni (685) 24142
samoalawsociety@samoaoonline.ws